

PRIJEDLOG ZAKONA O IZMJENAMA I DOPUNAMA ZAKONA O POREZU NA DOBIT

Član 1.

U Zakonu o porezu na dobit („Službene novine Federacije BiH“, broj: 15/16 i 15/20) u članu 36. stav 2. mijenja se i glasi:

„(2) Poreznom obavezniku koji je u godini za koji se utvrđuje porez na dobit izvršio investiranje u stalna sredstva i dugoročne plasmane u skladu sa MRS umanjuje se osnovica za porez za iznos investiranja, a maksimalno do iznosa ostvarene dobiti.“

Postojeći stav 3. se briše.

Stav 4. postaje stav 3.

Stav 4. koji postaje stav 3. mijenja se i glasi:

„Ako porezni obaveznik u periodu od pet uzastopnih godina izvrši investiranje u stalna sredstva i dugoročne plasmane u skladu sa MRS u ukupnom iznosu od najmanje 20 miliona KM, s tim da u prvoj godini investira najmanje 4 miliona KM, umanjuje se iznos obračunatog poreza na dobit za 50%.“

Postojeći stav 5. se briše.

Dodaje se novi stav 4. koji glasi:

„Ukoliko porezni obaveznik investira iznos od najmanje 20 miliona KM u kraćem razdoblju od pet godina ima pravo na umanjenje poreske obaveze 50% kao da je investirao pet godina.“

Iza novog stava 4. dodaje se novi stav 5. koji glasi:

„(5) Ukoliko porezni obaveznik otuđi stalna sredstva prije isteka perioda od tri godine od trenutka njihovog stavljanja u upotrebu, gubi pravo iz stava 3. i 4. ovog člana i dužan je da obračuna i plati porez koji bi bio plaćen da nije koristio pravo na umanjenje poreske osnovice u skladu sa zakonom.“

Postojeći stavovi 6. i 7. se brišu.

Stav 8. postaje stav 6.

Stav 9. postaje stav 7.

Član 2.

Ovaj zakon stupa na snagu osmog dana od dana objavljivanja u „Službenim novinama Federacije BiH“.

OBRAZLOŽENJE

ZA DONOŠENJE ZAKONA O IZMJENAMA I DOPUNAMA ZAKONA O POREZU NA DOBIT

I. USTAVNI OSNOV ZA DONOŠENJE ZAKONA

Ustavni osnov za donošenje ovog zakona sadržan je u članu III.1. tačka c), koji je izmijenjen Amandmanima VIII, LXXXIX i CVI, i člana IV.A.20.(1) j) Ustava Federacije Bosne i Hercegovine, prema kojima je u isključivoj nadležnosti Federacije donošenje propisa o finansijama i finansijskim institucijama Federacije i fiskalna politika Federacije, a Parlament Federacije, uz ostala ovlaštenja predviđena Ustavom, odgovoran je za donošenje zakona kojima se razrezuje porez ili na drugi način osigurava potrebno finansiranje.

II. RAZLOZI ZA DONOŠENJE ZAKONA

Posljedice izazvane pandemijom korona virusa u Federaciji BiH dovele su do pada investicija. Zbog pada investicija u znatnoj mjeri došlo je do smanjenja rasta prihoda, smanjenja privredne aktivnosti i ekonomskog rasta, smanjenja zaposlenosti, te smanjenja standarda.

Kako bi se preduprijedile i sanirale negativne ekonomske posljedice predlažemo da se donesu stimulatívne mjere. Jedna od tih mjera je i izmjena Zakona o porezu na dobit.

Predloženom izmjenom Zakona o porezu na dobit vrši se usklađivanje sa MRS. Slična rješenja postoje i u Republici Srpskoj, kao i u svim zemljama okruženja i u najvećem broju zemalja EU. Predloženo rješenje je u potpunosti u skladu sa EU direktivama.

Također, napominjemo da smo u razgovorima sa MMF-om ustanovili da MMF nema ništa protiv da se ovi poticaji uvedu.

Pored svega navedenog izmjene Zakona bi dovele do pozitivnih posljedica kao što su :

- Priliv stranih investicija;
- Stimulisanje poslodavaca da reinvestiraju umjesto što izvlače dobit iz preduzeća ;
- Doći će do rasta zapošljavanja i ekonomskog rasta;
- Neće se narušiti stabilnost budžeta, a dugoročno će se omogućiti veće punjenje budžeta.

III. OBRAZLOŽENJE POJEDINIH ODREDBI

Članom 1. je predložena izmjena člana 36. Zakona, a odnosi se **na umanjenje poreske obaveze u skladu sa investiranjem koje izvrši porezni obveznik.**

Potpuno je neopravdano zahtijevati da se samo za investicije iz vlastitih sredstava ostvaruje pravo na poreznu olakšicu. Cilj države je da se investiranjem podiže konkurentnost domaće privrede, veće zapošljavanje a po tom osnovu i veće punjenje budžeta i vanbudžetskih fondova. Pri tome je potpuno nebitno da li te investicije potiču iz vlastitih sredstava, kredita, lizinga ili bilo čega drugog. Proizvodna oprema nije pojam koji poznaju MRS. MRS poznaju samo stalna sredstva.

Ova odredba će sigurno u velikom broju pospješiti privredu i dovesti do povećanja prihoda.

Nadalje, postojeći stav 3. je nepotreban, jer je riječ o pravnom pleonazmu, a također je nebitno u koju vrstu stalnih sredstava se ulaže.

Stav 5. se briše obzirom da smo predložili novi stav 4. koji automatski zahtjeva brisanje stava 5.

Stav 6. i 7. se briše jer je izmjenom postojećeg stava 4. koji postaje stav 3. i dodavanjem novog stava 4. definisali da ukoliko porezni obaveznik investira iznos od najmanje 20 miliona KM u kraćem razdoblju od pet godina ima pravo na umanjenje poreske obaveze 50% kao da je investirao pet godina.

Dodavanjem novog stava 5. smanjuje se mogućnost manipulacije poreskih olakšica po osnovu investiranja u stalna sredstva.

Članom 2. utvrđeno je da ovaj zakon stupa na snagu osmog dana od dana objavljivanja u „Službenim novinama Federacije BiH“.

IV. FINANSIJSKA SREDSTVA

Za provođenje ovog zakona nije potrebno osigurati dodatna sredstva u Budžetu Federacije BiH.

ODREDBA KOJA SE MIJENJA

Član 36.

(1) Porezni obaveznik ima pravo na umanjenje plaćanja poreza na dobit na osnovu investiranja u skladu sa uvjetima propisanim u ovom članu.

(2) Poreznom obvezniku koji izvrši investiranje iz vlastitih sredstava u proizvodnu opremu u vrijednosti više od 50% ostvarene dobiti tekućeg poreznog perioda, umanjuje se obaveza obračunatog porez na dobit za 30% iznosa u godini investiranja.

(3) Pod investiranjem u proizvodnu opremu iz stava (2) ovog člana podrazumijeva se kupovina stalnih sredstava i to: postrojenja i opreme, uz izuzetak putničkih automobila, koju obveznik kupuje vlastitim sredstvima u svrhu obavljanja proizvodne djelatnosti.

(4) Poreznom obvezniku koji u periodu od pet uzastopnih godina izvrši investiranje iz vlastitih sredstava u ukupnom iznosu 20 miliona KM, s tim da u prvoj godini investira 4 miliona KM, umanjuje se obaveza obračunatog porez na dobit za 50% iznosa u godinama investiranja.

(5) Pod investiranjem iz stava (4) ovog člana podrazumijeva se ulaganje u stalna sredstava i to: nekretnine, postrojenja i opremu, uz izuzetak stambenih jedinica i putničkih automobila, koja će porezni obveznik koristiti u svrhu obavljanja proizvodne djelatnosti.

(6) Porezni obveznik iz st. (2) i (4) ovog člana gubi pravo na porezno oslobađanje ukoliko: a) izvrši isplatu dividende tokom i do treće godine od posljednje godine korištenja poreznog poticaja iz ovog člana iz dobiti koja je oslobođena plaćanja poreza na dobit; b) u periodu pet godina ne dostigne cenzus za investiranje iz stava (4) ovog člana; c) koristi pravo prijenosa poreznog gubitka do isteka druge godine nakon posljednje godine korištenja poticaja.

(7) Porezni obveznik iz stava (6) ovog člana je u obavezi obračunati i uplatiti razliku poreza na dobit kao da nije bilo poreznog umanjenja zajedno sa zateznim kamatama na javne prihode.

(8) Porezni obveznik ima pravo u jednom poreznom periodu koristiti jedan od navedenih poreznih poticaja iz ovog člana. (9) Federalni ministar finansija će Pravilnikom o primjeni Zakona o porezu na dobit propisati sadržaj i oblik obrasca pregleda nastalih, iskorištenih i neiskorištenih poreznih poticaja, kao i postupak dokazivanja.